

上虞縣誌
(光緒)
九

上虞縣志卷四十五

文徵內編

記

林泉歸隱記

明
張居傑

古虞東郭行不二舍近日朱菴其土廣衍以沃修篁嘉樹
蔚然蒼翠廻巒疊嶺秀巖屏障清流曲折襟帶乎左右芳
野幽禽日接平耳目是宜隱者之所居也朱氏子徽世居
其地外力田園內勤詩書既滋且殖爰質而文其心休休
焉以和其貌油油焉以澤樂此林泉之美若將終身焉洪

武中入庠永樂中辟掾有司考最績入銓曹竟以母老疾辭翩然東歸自號林泉歸隱與兄子徵構同心堂躬孝敬篤友愛延明師教諸子以敦善行縉紳士夫莫不高尚其志而推重之贈以詩章予謂李愿歸隱盤谷初未知合於義否也得韓子之文而名益重人皆爭效慕之然世所謂隱者固非君子之得已也聖人時而行時而止無可無不可子微之隱時乎否乎吾知子微抱奇瑰際明時振刷羽毛凌厲霄漢於以世用何施不宜而乃翻然效慕乎愿之樂而林泉以自適也耶噫子微之隱蓋有不獲已之至情

而又非李愿之可同日語者抱用世之具傷考殉國惻母
孀居陳情終養官顧不願祿甘永辭超時特出於紆紅曳
紫之中浩然長往於丹崖青壁之下蒼頭皓首幅巾優悠
藜杖高蹈於雲間塵外之人通而隱隱而通孝亦忠忠亦
孝豈絕然果於忘世者也身江湖心廊廟跡泉石行公卿
非尋常隱者流也敢記其心於卷末云爾

龍王堂碑記

謝 讜

夏蓋山之陰距巔若干武雲巖峭立巖下有潭廣可丈許
深不踰尺泉澄澄可鑒冬夏不盈涸或亢旱彌旬靡損恆

浸四旁幽草蔥菁詭石礪礪相傳有神物出沒其中祝者
所稱黑白二龍王是也每歲五六月間見於雲端則歲大
稔人咸德之顧妥靈無所祀報弗便余未第時夢示庇佑
意甲辰遂捷南宮浩德終不忘乃於辛亥仲春吉卽夫人
廟西隙地剏制堂三間左右室各一間甃石爲臺斲木爲
龕倩工程國用貌二王而以雷聖處其中蓋鈞有啟文錫
禧之澤者也粲然就緒萬朶扑躍慶元靈之永託禱祭之
有歸僉請刻碑堂左謹齋沐而爲之銘銘曰應元普化參
顯元威神變罔測淵躍天飛赤螭文蛟素幌黯鼉波端雲

際作隊前呼易沴爲祥濟暘以雨畬有穧穰境無鞅土佑
彰綏厄拯溺銷戎屢彰厥異並赫其功觀定揆日掄材孔
良麓基爽塏通構闕堂滄溟蕩北崇巒障南東列臨岫西
望楮龕檐柏籓松徑筠渚荻露靄嵐橫蒼圍翠積乾坤不
毀茲堂永存昭示遐禩爰勒斯文

遊三湖記

謝 讜

壬寅三月三日蓋山子潔舟載樽偕半塘子遊夏蓋湖柔
風翻袂雲澹絮紛方數里已成興矣停舟登九峰山迴幡
若龍叢蘓若耀錦鱗訪陳見川不遇復舟至祈山下牧子

競歌雙翬軒翥桃莊杏塢飄旆若招過馮山訪南岡子益
醪多簋微酣縱狂放舟至鏡潭波浮金碎鷁鳧弄萍蓋山
子扣舷而歌歌曰春日載陽湖溶溶矣春服既成我友同
矣時哉時哉思無窮矣於是脩鱗亂躍腴鯉並泳若起聽
歌者過小穴魚舳往來數塢點碧真天開圖畫也薄暮登
驛亭山循厓謁朱買臣廟嵐橫霞盡眉月遠天緩步竹旁
泉瀉瀉入耳未幾嘯虎嘯猿恐然歸卧篷底明日過石堰
進白馬湖綠漾鴨頭四山影落謹聲谷應斜柳拂衣半塘
子曰不減夏蓋也登田山又登月山訪趙象山不遇遇三

畏子東五里楊家溪又五里蘿巖山以南岡子三畏子遲
於行不往僅三里謁宋太祖廟高松逼漢側磴苔芳可停
翫也茆檐雞唱午煙歛飛飲三畏子別墅鳥嚶鳴侑觴過
陳石虎嶼訪龍岡散人又偶會海環子相與登龍松嶺坐
觀音堂攢峰異卉雲生履外恍乎躋方壺而隔塵世俯視
白馬則隘矣散人折纖筍抽螺鱸鯽鰱促飲燭再然乃
已宿猗圩洞石榻紙幃僊僊如也又明日尋曲徑度三四
嶺謁西橫塘廟爭取碧桃遂借二小艇汎上妃湖荇絲繫
篙銀鵲隊舉三畏子問南岡子曰此何如夏蓋海環子大

笑爲不逮甚也出三條塘更舟至百官謁舜帝廟活石參
璐長江流帶會稽諸山鬱鬱送青輿不可了忽原舟來迂
別散人三畏子而還是游也海環子半塘子俱有龍岡歌
南岡子有買臣廟詩蓋山子有懷舜帝詩

重修大成殿記

陳絳

我虞儒學修於隆慶庚午迄今十五載勢漸以圯萬厯壬
午春淮陽朱侯維藩來蒞茲土拜於殿下退語諸生曰學
校之隆替世道之盛衰係焉詎可一切委棄之以至於此
耶居數月以入覲行明年夏又以旱故拯輯不暇冬十二

月乃用諸生言請于當道諸公咸報可迺諏日祭告庀材鳩工易其桯楹加以丹堊蓋以甌窳民不加賦吏不告勞三越月而煥然美矣釋菜禮成觀者如堵咸嘖嘖嘆曰匪我朱侯曷克有是文明之治乎學諭程君克昌司訓戴君士完謝君璿走不佞請記於戲宮室之壞人恥焉而人修焉凡以棲止之不苟也壞其身而不恥恥之而不知修豈以宮室之修也易而身之修也難哉吾見修宮室者採木于山伐石于巖取瓦甃于陶收膠漆金錫于市而又求良工以治焉一不集則事不舉若是乎難也君子之修身不

然暴則修吾仁枉則修吾義蕩則修吾禮惑則修吾智一反求而身自修矣身修則經綸參贊胥此焉出其事比于宮室不甚簡而易乎人顧明于宮室而暗于修身余所未曉也虞爲大舜封邑有聖人之化士生其間力學務本多清操直節如王充魏朗朱儁嵇紹之流顯著漢晉宋文公朱先生提學浙東嘗講學月林泳澤書院當是時文才輩出土風大振至季世猶聞李莊簡公面叱秦檜劉忠公論罷史嵩之今讀其書尙令人悚懼入國朝陶以禮樂漸漬日久士之抗節勵行爲斯學之重者尤加盛焉往者無論

已卽余所覩記如葛公浩之折逆瑾車公純之諍大禮吾
兄紹與徐公學詩謝公瑜葉公經之指斥權相皆轟然震
動名載史冊今之士頗有前輩餘風侯復迪之正學重建
文公書院羣諸士於其中較藝督課闡明聖賢微言奧旨
而又復西溪湖建奎文塔俾諸士遊焉息焉曉然悟毅然
往躋其巔而窮其源如孔子之登太山觀呂梁朱子之陟
雲谷歷九曲不造其極不已也豈獨文章功業云乎哉此
侯修學之意惓惓于爾多士而諸生之所自修以求無負
于侯者也侯別號貞石萬歷丁丑進士

重建羅星亭碑記

徐人龍

虞標勝以東山而東無山東山在西南上游受剡水下曹娥爲通邑西蔽自梁湖而東一水瀉姚僅衣帶暑月車喧河涸可步故新舊通明壘壩若城高不則置杯水溜上傾而下無遺滴矣以是虞慨留逝水如惜身血誠養生要害非第形家言關鎖也邑治東去三里名龍王堂西南山谿并湖水所匯注河至此稍寬流弗及顧於是有橋有塔有祠閣錯屬爲障而水中一簣隱起似造化亦不欲令此水忽去者清江錢侯顧而美曰可因也益石作星墩亭其上

中流一壺千金長頓令鼓枻上下者宛抱依違而不迅走

且與閣橋塔祠珠聯錦綴若聚五星于東壁者

奎文閣爲土星聯登

橋爲水星奎文塔爲木星舊址文昌祠傾以其

奎文盛而

半改建何侯祠爲金星今得羅星亭爲火星

華選駢雖天與人亦地利也無何始創不工百川奔囓加

以櫓樺冲突風雨飄搖亭壞石圯孤星向曙滅沒難尋譬

金焦奇踞大江中令巨鼇倏負去望洋何堪斯行道所興

嗟而虞士紳悲零落而思補也溫陵仁庵李父母下車披

四履喫緊以東震聚氣轉瀉爲言捐萬錢經始而先是鳩

率非人庀作徒費乃請邑紳赤城陳公董其事公舊有船

租之助曰予志也若實倡之敢不任任必觀厥成與衆寧
獨乃親相度自木石細及灰瓦皆精思及之善建不拔從
根爰始於丈址外環椿密圍之舟不得近巨石砌水底壘
而高出水丈餘立大石柱於墩中長二丈有四入土三之
一隆然標舉六角柱石俱大石縱橫挽筍總轄中柱壓口
石如之築壘堅泐洪莫入乃可寬亭構也選木精聖一切
直架迂穿還以中石柱爲軸故重能載亂能繫複壁禦風
雨填盤石而四維之又慮歲葺之匱搜祠閣贍田及已船
租昔所乾沒者今出貯善後著爲令役始于甲戌仲春九

日孟夏中竣七旬而舉量省有方材值工餼不苛不濫僧
元宗與有勞焉計用錢十六萬有奇諸紳助十之三其二
皆公捐之筭中者公固曰天下衆則咻而勇于獨心力獨
勞以惠通邑吾儕愧矣當官苟且圖溫飽良田美宅貽所
不知何人鄙不足道抑或端居自守視秦越人肥瘠夫何
賴焉修之家其德乃裕修之邦其德乃豐修之天下其德
乃普堂上不糞除郊草不贍芸鄉之不睦而能爲德于邦
國天下者未之聞今天下在所摧破以憂貽君父動嘆乏
才夫才甯借之異代哉倘更發函治獨知之契使天下見